

na cai

anuncios >>

Contra les declaraciones de Jordán Suárez (CMX)

El pasáu martes 19 d'abril, el nuevu presidente del Conseyu de la Mucedá de Xixón fixo unes declaraciones penoses en La Nueva España nes que sofítaba ensin complexos les teoríes y polítiques de mucedá del **gobiernu de Nerón Areces**. Carlos Suari (**MIAS>>**) retrucó na mesma mañana *"ye inalmisible presentar como bonos los datos que manexa'l Principáu en materia d'emigración xuvenil, cuando ye un fechu constatáu la fonda indignación que creó'l so aireamientu hai poques selmanes, recibíendose mui bien de crítiques dende tolos sectores sociales, y ye que, a estes altures, siguir col xuegu dolorosu de la 'lleenda urbana' nun ye más que la materialización de la irresponsabilidá del PSOE nesti tema y de representantes xuveniles, como'l presidente del CMX, que lleguen a ciertos cotes de poder cola única fin de validar el discursu intolerable de los 'veteranos' del so partíu"*.

Crónica de les Xornaes d'ExG

Los pasaos 25 y 26 de febreru celebráronse en Mieres les primeres xornaes sobre **Internet, Música y Copyleft** entamaes pola asociación **ExG** cola collaboración de **MIAS>>**.



Los collacios d'ExG amestaron yá na so web la crónica sobre'l desarrollu de les xornaes que foron un ésitu de públicu. El vienres 25 entamaron les actividaes con un **conciertu** de los grupos **Lego my Ego, Stoned Atmosphere** y **Dj Rayito**. Yá de sábadu llegaron les conferencies sobre **Copyleft**, los formatos abiertos **d'audio** o les redes **peer to peer (P2P)** a cargu de **César Rendueles, Luis Rodríguez** y **Xabiel**

G. Pañeda. Darréu, entamóse una mesa redonda cola participación de **Carlos Redondo** (de Felpeyu), **Arma X** (de Stoned Atmosphere) y **Pedro Vigil** (Edwin Moses, Vigil, Penelope Trip).
www.ias.as/exg

en trés entrugues >>

Ignaciu Llope

1>> ¿Qué ye IAS y qué cargu tien na organización?

IAS son les sigles del partíu políticu Izquierda Asturiana, del que soi portavoz de la Dirección Nacional.

2>> ¿Y los sos oxetivos políticos?

IAS ye un partíu socialista, ecoloxista y asturianista. Ye dicir, busca la consecución d'una Asturias soberana dientro d'un marcu de xusticia social y procuru pa col mediu.

3>> ¿Próximes cites de l'axenda?

Taremos na manifestación del Día de les Lletres Asturianas glayando a les clares qu'esto que mos vienden como normalización del nuesu idioma *"nun ye plan"*.

l'lingua >>

Lletres 2005: Otra oportunidá perdida

Como tolos años, nestes feches averámonos a un nuevu *Día de les Lletres Asturianas*, qu'entama dende va 25 años l'**Academia de la Llingua Asturiana** el día 6 de mayu nel Teatru Campuamor d'Uviéu, dende les 20hores. Dende **MIAS>>** topámonos, otra vegada, con una oportunidá perdía pa la llingua asturiana, con un gobiernu del PSOE sofítáu por IU-BpA, que sigue permitiendo que n'Asturies haya ciudadanos de segunda, que ven marxinaos y reprimíos los sos drechos por mor d'emplegar l'asturianu.

Poru, **MIAS>>** defende la OFICIALIDÁ de la llingua asturiana como única ferramienta pa la normalización de la llingua asturiana y pa la supervivencia del idioma, frente al conformismu y a los planes de normalización estériles y sofitará la manifestación de la **Xunta Pola Defensa de la Llingua Asturiana** del 6 de mayu, a les 19hores na Estación del Norte, col llema: *Na reforma l'estatutu, l'asturianu llingua oficial*.

enseñu y trabayu

Xeoloxía en llucha

Daqué ta moviéndose ente les/los estudiantes de xeoloxía de la Universidá d'Uviéu. Les nueves propuestas nel marcu del tratáu de Bolonia, pa equiparar les titulaciones en toa Europa, nun dexaron otru camín a los estudiantes que la movilización. Dende la comisión qu'elaboró el proyeutu preténdese crear un títulu de *xeoloxía de trés años y otru d'inxeniería xeolóxica* -inexistente n'Europa- de cuatro años. A xuiçu de los estudiantes, xunto colos profesores y'l Colexu Oficial de Xeólogos, esto constitúi un ataque frontal al so futuru llaboral y a la dignidá de la profesión, *que quedaría arrexugada al campu del enseñu y a los museos, dexando l'ámbetu de la xeotecnía o la hidroxoloxía en manes de los nuevos "inxenieros"*.



Amás, Uviéu ye cabezalero na protesta, coordinando a les distintes facultaes y estudiantes del estáu y les movilizaciones a desendolcar, ente les que tan manifestaciones tolos vienres énte la Delegación del Gobiernu n'Asturies, encierros na facultá del campus de Llamaquique y una posible marcha d'estudiantes a Madrid. En **MIAS>>** sabemos que nun ye l'únicu conflictu xeneráu polos acuerdos de Bolonia y encamentámosvos a lluchar por una enseñanza de calidá y con futuru llaboral

Ileenda urbana >>

Nel I Festival de Cine Asturianu en Madrid

Cuantayá, asturianos con un proyectu y ganes de trabayar sacaron alantre la primer película asturiana, agora, van cumplise **100 años d'aquello** y, como homenaxe, el día 27 d'abril, celebróse'l I Festival de Cine Asturianu, en Madrid. Dende **MIAS** animóse a asistir al eventu afitando tamién un puntu d'alcuentru pa

tolos asturianos emigraos que como "**Ileenda urbana**" residen na capital española. Tres de la introducción sobre los nuegos cien años de cine, entamó la proyección de los curtios, primero pasaron pela pantalla los 5 a concursu pol *Meyor curtiu asturianu en castellanu*, **El beso de la tierra, El corazón delator, Lencería de ocasión, Mister Dogma y Xicu'l toperu**. Tres d'ellos vinieron los 4 curtios qu'optaben al premiu de *Meyor curtiu n'asturianu*, **Lo que necesites selo yo, La neña los mios güeyos, Imaxe accidental y 7337**. El Meyor curtiu asturianu en castellanu foi **Lencería de ocasión**, de *Teresa Marcos*, y el Meyor curtiu n'asturianu foi **7337**, de *Sergio Gutiérrez Sánchez*. En **MIAS>>** yá tamos naguando pola próxima edición.

ecoloxía >>

Torretes NON

Asina de claro y alto lo dixerón los collacios d'**IAS Piloña** esti día. Non al trazáu Soto-Penagos. A l'aición que se ve na semeya súmase una interesante entrevista de representantes d'IAS col alcalde del pueblu cántabru de Penagos, vieyu conocedor del casu.



¿Muselón?

Nun momentu en que la navegación mundial tira pol tráficu de contenedores a pequeñes y medies distancies, El Musel plantea como única salida p'Asturies siguiu carretando carbón sudafricano a 40 € la tonelada pa quemalo nes térmiques. Agora que'l tresporte marítimu ye una parte más enxertada nos procesos de producción d'una economía fabricante de productos elaboraos, El Musel apuesta por un modelu de tráficu de materies primes, haciendo-yos un favor gratuitu a Arcelor y les eléctriques, que van disponer d'un cai xigantescu y d'unos parques de minerales pagaos con perres públiques, que nun van esmolecese de revertir a la sociedad, que tendrá d'aguantar un impactu mediambiental y paisaxísticu escandalosu por demás.

+ecoloxismu+sustentabilidad+futuru
+xusticiasocial+igualdá+llibertá+paz
+asturiesindependencia+oficialidá

faite sentir
bienalto



www.ias.as/mias
mocedá d'izquierda asturiana
participa llucha tresforma piensa

qué ye mias >>

Somos un grupu de **xente mozo** que facemos por esparder una **conciencia crítica** colo que nos arrodiya dende una perspectiva **asturiana y d'izquierda**. La



Ecología, la Xusticia Social y l'Asturianismu son les exes de la nuestra actividá. Actividá que tien de ser fecha **por y pa la mocedá**

asturiano, amosando que n'Asturies somos munches/os les/os que nun tamos d'alguerdu col **modelu actual**, que nun vemos con bonos güeyos "**l'autonomía**" **ruina y emprestada** que nos "regala" l'estáu español, que nun asumimos como igua al nuestro futuru la **emigración** obligada, nin la explotación de los **trabayos basura**. Que nun llamamos frente a la **discriminación sexista** que les moces tamos careciendo, nin a la implantación cuasi colonial de **multinacionales**, nin al esfarrape del nuestro **mediu ambiente...**

Trabayamos pa da-y al nuestro país **otra traza**, otru sentir. Queremos una Asturies **respetuosa col mediu, ensin xéneros**, que s'enfrente a la globalización del beneficiu pa cuatro, pa **mundializar los derechos sociales y llaborales**. Una Asturies arguyosa de la so **identidá**, del so valir **cultural y llingüísticu**, una **Asturies soberana**, dueña del so futuru y qu'apueste pola **democracia participativa** con una ciudadanía protagonista de les decisiones que-y afecten. Una **Asturies llibre**, onde la **opción sexual** nun seya torga pal desenvolvimientu social.

Queremos ser la mocedá que faiga por **otra Asturies**, l'Asturies de la xusticia y de la llibertá. **Ente toes y toos** vamos construyir l'**Asturies que vien**.

LLUCHA CON NÓS>>
Mocedá d'Izquierda Asturiana

www.ias.as/mias >> mias@ias.as

Primo de Rivera, 1, Oficina 9. 33001 Uviéu.